

Tixrmoxrtaexl Sul Vaexr Beil Ber

1

¹ Tixrmoxrtaexl, ngo mel Barloxr a. Niul leil jiuxlsu Arbosobo nei niul lei loxia dae Yisu Zidu ngo leil miardal a, ngo Yisu Zidu miardal dae ca ddei bei a. ² Tixrmoxrtaexl, ni mel ngo saelsael a Yisu leil ddarzzi a, yel ngo ddei ssorga sael a nga.

Niul ddei Arbbor Arbosobo nei Seirpor Yisu Zidu leil ni leil cirza-hanga meixl gger lol nia, ni leil zoxlnixr lol nia, ni leil nixmox zzaso lol nia.

Nr Hoxr Mul Gger Su Ca Hal Mel Leil Bota

³ Ngo Marcixrduixl mermi ssi halleix dder ni leil Yirfuxrsor zzi gga hher dae nia quex goxr a. Ni ca mel leil miardal a nr hoxr mul gger lol nr ddo, ⁴ halae nrbba nrbba biar dae gurlir mel nei bbeix lei bbeix jjia nr ddo yaa ddei hormo zeix nei hormo zeix porpor mel leil biar dae hal mel, ca mel leil mul gger lol nr ddo. Yaa ca leil eil mel mul gger a mel ca mel leil zzicarzzi dax zex lol var lalnga, ca leil Arbosobo ddei miar^a bei ssi lol nr var. Arbosobo ddei miar mel yar leil ddarzzi a saelnei bei cexr. ⁵ Ni yaa leil eil mel miardal a mel ca leil zzicarzzi leil perniar lol niazzir a nga arddeir a. Ca mel nixmox zzar seibeixbeix arla botaddu nr zza, halae yarzi Yisu leil ddarzzi a saelnei ca leil perniar var. ⁶ Ca cirmelmel a eil mel dax bei mae nr nga a nei, nga-nr-zi hal mel lei biar. ⁷ Yaa Moxrxi vaexr dae Lixlfaxr mulggersu ca bei meixr, nael yaa armael biar dae mel lei azo yilsu a yaa nr saexl, yaa zzir dae a yaa yarzi saexl ddar hal mel lei yaa saexl gax-nr-zi.

^a**1:4** *Arbosobo ddei miar* Arbosobo ddei miar mel Yisu ddei ddar seirseir mel ca mel leil biar gger a, yaa leil jiuxl wo lol.

⁸ Nael niul lei saexl, ca mel Lixlfaxr^b sser a mabbabba a sser arddeirnga a mel, Lixlfaxr ddei dder seir. ⁹ Niul halae saexl, Lixlfaxr ddei mel nixmox seir gaxzi su mel leil dixl gger dae nr nga. Lixlfaxr dax bei nr mae su, guaxr wor nr ddo su, Arbosobo leil i nr du su, zuixl bei su, Arbosobo leil nr zi su, middurbbor ddei cirza-hanga mel lizoxr su, arbbor ama leil bei zil gger su, caseixlsu, ¹⁰ halae kerjiar su, capor maerssor nr loxr seir zzi dax naer su, capor car capor lizoxr su, ca vur su, ca fur su, caserggie ddar jiar te su nei ca leil hoxrhoxr mul gger dae hal mel dax dir su ca eil mel leil dixl gger dae arddeir a. ¹¹ Ca leil hoxrhoxr mul gger dae mel mel Yisu leil biar dae ddar seirseir mel dax zox dae. Ngo Yisu leil biar dae yarzi quexrlixl zza ddar eil mel mel, niul bbeix zae gger dae Arbosobo ddei ngo leil mul gger lol a.

Arbosobo Barloxr Leil Zoxlnixr

¹² Niul ddei Seirpor Yisu Zidu zzir dae a, ngo leil ddarzziddo, yar dder ngo leil bbesur zza lol a, ngo leil zi a yar leil visser lol, yel ngo yar leil nawo a. ¹³ Halleix ngo Yisu leil ddar-nr-zzi seir, ngo azo bei dae lei nr saexl, yel ngo yar leil bbeix no goxr, yar leil bixr goxr, yar leil bbeix vuxryixr goxr bbeixarnar, nael yar halae ngo leil zoxlnixr. ¹⁴ Niul ddei Seirpor mel ngo leil cirza-hanga lei daxlgaxl-daxllixl meixl gger, ngo leil yar leil ddarzzi lol, halae ca leil perniar lol. Yar eine bei a mel ngo Yisu Zidu dax hher ji dae a nga arddeir a.

¹⁵ “Yisu Zidu middurbbor zei lei a zuixl zza ca mel leil jiuxl lei arddeir a.” Ddar eil qier mel yarzi bbeix hoxr, cirqier-lorbba lei ddarzziddo. Zuixl zza ca mel gga ngo mel zuixl neixl zzir ddei nga a. ¹⁶ Nael hherdder eine nga a, Arbosobo ngo leil zoxlnixr arddeir a. Yisu Zidu mel ngo zuixl neixl zzir ca eil ddei leil ssoxrsuxl a, kebal ca mel leil yar ngo dax yarzi

^b1:8 *Lixlfaxr* Lixlfaxr eil ddei mel Arbosobo ddei Lixlfaxr leil bbeix.

sael ssertexr zza saexl lol. Yar eine bei a mel, arddolcar a yar leil ddarzzi cirse-cirsil gol dae su mel leil yar yaa leil lei yarzi sael ssertexr zza saexl lol. ¹⁷ Arbosobo mel cir ddeir lar zza. Yar cirse-cirsil lei zzirmar bei nia, cirse-cirsil lei zza dae var. Ca mel yar leil mia nr xie. Yar leil cirse-cirsil lei middux lol nia, halae i du nia. Amae.

¹⁸ Albor, ngo halleix xiezi mel ni arsaie bei nia bbeix har zaxr goxr ddar mel dax zox dae a, ni leil miardal a Yisu Zidu ddei ddar seirseir mel leil dir su mel dax dir nia, hherdder meixr mel zabbar seirseir a zaxlddaexr mel sael a nga. ¹⁹ Ni zabbar seirseir a ddarzzi zei si nia, armael nixmox taex leil botaddu nr zza nga nia. Ca cirmelmel a armael nixmox taex leil botaddu zza zza nr zza lei nr guaxr, yel yaa zeixleixr Yisu leil ddar-nr-zzi a. ²⁰ Sumirnaer nei Yallixlsadaxl yaa nr nel mel ca hal mel dax ciryoxr a nga. Ngo yaa leil Sardaxl leixrga gga jia ji gger a mel, yaa leil goxr solsolmo goxr lol a, yaa leil Arbosobo leil bbeix no nr ddo zza wo lol.

2

Jiaxlhuixl Gga Arsaie Lerler Bei Nia

¹ Yel ngo dder ni leil quex, ni hoba ca cirddeir-hanga leil zabbar seirseir a Arbosobo dax ddar biar gger, halae Arbosobo leil qiuxr a yaa leil beijjiu lol, yoxl yaa leil Arbosobo leil nawo gger. ² Ni halae yoxl zzirmar mel leil nei vaervaerpor maelmaerjia leil Arbosobo dax ddar biar gger. Eine nga a mel niul nixixl goxr a lei nixmox zzazza-sosomo, ca mel lei zzi dax toltor a nga, halae Arbosobo leil yarzi i du a yar leil zi, eine goxr cexr. ³ Eine bei a mel dder seir a; niul leil jiuxlsu Arbosobo lei yarzi nixmox lodda a. ⁴ Arbosobo mel mer woxrke ca hazza leil lei jiuxl wo lol niazzir, halae yar ddei ddarzi mel leil saexl lol niazzir.

⁵ Arbosobo mel cir ddeir lar zza. Arbosobo nei ca mel aga gga ca lei cir

ddeir lar zza. Yar mel ca loxr a; hherdder Yisu Zidu ddei nga a. ⁶ Yar yar ddei olga ddei pixl a, cassor-worssor maelmaerjia leil vae xixl lei cexr. Yar eine bei a mel, Arbosobo dixl har dae nixixl ddei dax zox dae a, ca mel leil saexl lol, Arbosobo mel ca mel leil jiuxl niazzir. ⁷ Yel Arbosobo ngo leil miardal a, Yisu miardal dae ca bei lol a, Yoxrtaexl su nr nga ca mel leil yar ddei ddar mel biar gger ssi lol, halae yaa ddei sulmulu bei lol, yaa leil ddarzi mel leil saexl lol. Ngo mel ddarjia nr te lei, ngo bbeix dae mel mel yarzi a.

⁸ Capor mel arddolmaex hher dae lei, ngo yaa nixmox cirtaex-lorbba lei Arbosobo dax bei mae dae a leixrhher bil du lei a Arbosobo dax ddar biar loxia. Yar sirzzi ddu lei nr zza, ca dax lei nr zex, Arbosobo dax ddar biar.

⁹ Ssormaer mel ggecir leil azo lerler veixr nei ddexr a lei, ngo yaa veixr hoxr-nr-sil hal mel veixr lo-nr-xia, maermaer-ssissi arla, i goxr ddo hal mel veixr loxia nei ddexr loxia. Halae olce pir, piu sae, helvirsær naxrcixlcixlmo hal mel ddexr nei perniar-perdae pia hal mel veixr lo-nr-xia. ^{c 10} Ssormaer arddol mel Arbosobo leil i du bbeix arddeirnga a, yaa dder azo bei a lei seirseir bei. ¹¹ Ssormaer mel ddar miur nr ddo, yar leil mulggersu ddei mul gger dae mel zza nia, halae yar ddar no.

¹²⁻¹⁴ Arbosobo mel Yalda leil hoba coxl a saelnei Xiaxlwaxr leil coxl.

Halae sae te mel Yalda leil fur wo nr nga a nei ssormaer ddei leil fur wo arddeir a. Ssormaer ddei leil mel sae te fur si a, yar dder zuixl bei ssi a.

Yel ngo ssormaer mel leil capor leil mul nr gger lol, halae capor leil nr guaxr lol, yaa mel ddar miur nr ddo. ¹⁵ Nael yaa armael leil guaxr ssei xie, yaa Yisu leil zabbar seirseir a ddarzzi, ca leil perniar, Arbosobo dax bei mae gaxzi, eil mel bei zei si a mel, yaa ssormine hier car a yaa leil jiuxl

^{c 2:9} Barloxr eine bbeix a mel, yar dax halleix bei zza wo dae me leil zox dae a, bbeix arddeir a.

wo ddo.^d

3

Jiaxlhuixl Gga Ddei Vaervaerpor Mel Leil Biar

¹ Ca mel bbeix: “Arseir jiaxlhuixl gga ddei vaervaerpor bei niazzir a mel, yar seirseir bei niazzir a nga arddeir a;” ddar eil qier mel yarzi ddarzziddo. ² Yel jiaxlhuixl gga vaervaerpor bei su mel botaddu nr zza, yar maerssor cir ddeir lar zza,^e azo bei lei barverver a bei, armael leil guaxr ssei xie, ca mel lei yar leil i du, piar nr saexl ca mel leil hexl meixr, ca leil mul gger var, ³ zzibbaer dda-nr-yixr, ca nr deil, ca dax hoxr ddo, ca dax toltor a bei, zzirbae nr tuxr, eil mel bei nia. ⁴ Yar halae armael ddei ake guaxr a yarzi guaxr seir nia, yar ddei anix mel lei yar leil i du gaxzi nei yar ddei ddar no. ⁵ Ca mel armael ddei ake guaxr nr var arddeirnga a mel, yar arsae Arbosobo ddei jiaxlhuixl ddei leil guaxr var bbeixleir? ⁶ Jiajia Yisu leil ddarzzi a nga seir hal mel leil, jiaxlhuixl gga ddei vaervaerpor bei lol nr ddo. Nr nga a, yar col a dder neir zzirmar te sael a zuixl bei ssi a, Arbosobo dder yar leil neir zzirmar te dax ciryoxr a ser var. ⁷ Jiaxlhuixl gga vaervaerpor ddei leil mel Yisu leil ddar-nr-zzi su ca mel yar leil i du nia. Nr nga a ca mel yar leil bbeix no a, yar dder neir zzirmar te ca leil xiagl dae ddei gga de ji dae var.

Jiaxlhuixl Gga Miar Bei Su Mel Leil Biar

⁸ Jiaxlhuixl gga miar bei su ca mel^f lei eil mel sael a nga nia. Yaa ngazi

^d2:15 *yaa ssormine hier car a yaa leil jiuxl wo ddo* Ddar eil qier mel yarzi noni wo sol. Azo yilsu zza bbeix nr seir.

^e3:2 *yar maerssor cir ddeir lar zza* Ca cirmemel a zzir dae a yilsu mel dder kebal ssormaer dax kerjiaer nr ddo.

^f3:8 *Jiaxlhuixl gga miar bei su ca mel* Jiaxlhuixl gga miar bei su ca eil

mel lar bbeix; nga-nr-zi mel nr bbeix, zzidda-zziyixr nr bei, zzirbae sei-nr-beix mel nr tuxr, ca mel lei yaa leil i du. ⁹Yaa mel nixmox zzar armael leil botaddu nr zza, Arbosobo yaa leil saexl lol dae ddarzi mel leil ddarzzi zei si. ¹⁰Nael hoba yaa leil arleixr sixr i nia; yaa yarzi botaddu nr zza a saelnei yaa leil jiaxlhuixl gga miar bei lol ddo. ¹¹Yaa ddei maerssor mel lei eil mel sael a nga nia. Yaa ca mel leil bbeix vuxr-nr-yixr, barverver a nga, azo bei lei ddarzziddo, ca mel lei yaa leil i du. ¹²Jiaxlhuixl gga miar bei su ca mel, maerssor cir ddeir a zza ddo, halae anix guaxr nei ake hher dae ca mel leil guaxr a lei yarzi guaxr seir nia. ¹³Yaa Arbosobo ddei jiaxlhuixl gga zabbar seilseir a visser a mel, ca mel yaa leil i du, yaa halae velver a Yisu Zidu leil ddarzzi zei si.

Kerzi Dae Yarzi Zoxlyoxl Hal Mel Leil Biar

¹⁴Tixrmoxrtaexl, ngo nialngasael ni dax halmaex ssi a ni leil mia loxia, nael ngo halae xil eil fo ni leil vaexr gger. ¹⁵Eine nga a mel kebal miar mel ngo leil dawo a, ngo nia dax ssi nr cexr arddeirnga a, nia xil eil fo leil i a dder, nia Arbosobo ddei ake gga ca mu a arsae mu saexl a. Arbosobo ddei ake mel dder cirse-cirsil lei gol dae Arbosobo ddei jiaxlhuixl ddei nga a. Bir dae a bbeix: Arbosobo ddei ddarzi mel xi ar zzir nga arddeirnga a, jiaxlhuixl ddei mel sseigu nei sixrjiuxr sael a Arbosobo ddei xi eil zzir leil dox gex dae a. ¹⁶Arbosobo halleix kerzi dae, nael eilleix ci a, ca mel leil saexl lol yarzi zoxlyoxl ddarzi eil mel mel yarzi a mar:

hherdder Zidu mel ca loxr a, ca ggecir ar ddei zza a;

Arbosobo ddei Xiu ddei yar bbeix dae mel nei bei dae mel hoxr ca

mel lei vaervaerpor a. Yaa jiaxlhuixl gga ca mel leil visser.

mel leil saexl lol a;⁹
tisir mel lei yar leil mia a;
ca mel yar leil circuxr-hanga dax lei biar ci a;
mer woxrke zzarvul-zzarmae yar leil ddarzzi su zza a;
yar leil mel bbobbolbbo merlabbor zi deix si a.

4

Sulmulsu Yarjiar Leil Biar

¹Nael Arbosobo ddei Xiu ddei mel malma bbeix: arddolcar a mel, ca cirmelmel a Yisu leil zeixleixr ddar-nr-zzi var. Yaa mel ca leil fur su xiu mel dax bei mae nei neir mul gger dae mel noni. ²Ca seir bei laexl su eil mel neir ddei ddar mel sser a ca leil fur; yaa ddei nixmox taex mel anol zzor ji si ho a.^h ³Yaa mel maerssor bbeix su mel leil lei nr bbeix lol, ssormaer fu su mel leil lei nr fu lol guaxr gex dae. Halae ca mel leil zzorlabox cirmelmel a lei zzor nr ddo eine bbeix. Nael zzorlabox eil mel mel Arbosobo coxl teixl lei a, ca mel leil zol. Yel Arbosobo leil ddarzzi a yar ddei ddarzi mel leil saexl su mel Arbosobo leil nawo a, zzor.

⁴Arbosobo bei teixl lei hazza mel dder seir, yel ca mel yar leil nawo a, li dae lalddo, azo lei nr li bei nr ddo. ⁵Arbosobo bbeix “zzor cexr” bbeix goxr, halae niul zzor car yar dax ddar biar, yel zzorlabox eil mel zzor ddo.

Yisu Zidu Leil Visser Su Ca Seirseir Mel Leil Biar

⁶Ni ddar eil mel arzzi-nimar, arzzi-nimo mel leil mul gger arddeirnga a,

⁹**3:16** Arbosobo ddei Xiu ddei ca mel leil Yisu Arbosobo ddei ssor a saexl lol.

^h**4:2** *yaa ddei nixmox taex mel anol zzor ji si ho a. Xilaxl ddar bbeix: “yaa ddei nixmox taex mel yarzi taxl he mel taxl zixl gger ho a.”*

ni dder Yisu Zidu leil visser su ca yarzi seir ar ddei a. Ni ddarzi mel leil ddarzzi nei hoxrhoxr mul gger dae mel dax bei mae dae a mel, ni dder Yisu leil ddarzzi su ca hhelhhelmo ar ddei loxr var. ⁷ Ca mel ddei porpor dax biar zeil lei a Arbosobo ddei ddar nr nga, nrbba nrbba biar dae hal mel biar nr ddo. Ni armael leil ho bei ho Arbosobo ddei ddar no lol nia. ⁸ Armael ddei ggecir ddei leil hhel du lei lol a, ggecir ddei leil lar seir. Nael ni Arbosobo ddei ddar no a, Arbosobo ddei Xiu ddei dder ni nixmox ddei leil hhel du lei lol var. Eine nga a mel dder cirza-hanga lei seir a; halae niul middurbbor goxr dae eil se dax lei guaxrzoxr, arddolcar a merlabbor hher dae hal se dax lei guaxrzoxr. Eil mel mel hherdder Arbosobo niul leil gger nia bbeix har zaxr goxr mel nga a. ⁹ Ddar eil qier mel maelmaerjjia lei yarzi bbeix hoxr, maelmaerjjia lei yarzi ddarzziddo. ¹⁰ Yel niul dder yarzi sulku yar dax bei mae dae. Niul, cirse-cirsil lei gol dae Arbosobo niul leil gger nia bbeix har zaxr goxr mel li wo loxia. Yar mel ca maelmaerjjia leil jiuxlsu ddei a; yar gielgiel yar leil ddarzzi su mel leil jiuxlsu ddei a.

¹¹ Ni eil mel ca mel leil mul gger nia, yaa leil miardal a bei lol nia. ¹² Ni koxltor nor a lei ca mel leil ni leil i zeil lol nr ddo. Ni seirseir xiar dae, seirseir bbeix dae, seirseir bei dae, ca leil perniar, Yisu leil ddarzzi eil mel maelmaerjjia lei bei nia. Eine nga a mel, ca mel ni leil i dae a dder ni sael a bei a. ¹³ Ni ca leil Arbosobo Ddei Sul ber zza gger, Arbosobo ddei ddar biar gger nei ca leil mul gger miar eil mel bei a lei zabbar seirseir a bei nia, hherdder ngo lei zzezze bei ci. ¹⁴ Ni Arbosobo ddei Xiu ddei ni leil bbesur zza lol eil mel zoxl-nr-yoxl zzir nr ddo. Bbesur eil mel mel halleix ca leil guaxr su camar mel leixrhher ddei ni leil ta gex dae a ni leil gger a. Ca mel ni bbesur eil mel li wo nia bbeix har zaxr goxr a. ¹⁵ Yel ni miar eil mel bei a mel, nixmox cirtaex-lorbba miar eil mel leil xiar dae a zabbar seirseir a bei nia. Eine nga a mel, ca mel dder ni ho bei ho Yisu

leil ddarzzi su ca hhelhhelmo ar ddei loxr a i teixl lei a. ¹⁶ Ni ca mu a, armael leil guaxr nia, ca leil azo lerler mul gger a lei fadae nia, ni zabbar eil mel bei ze i nia. Eine nga a mel ni leil jiuxl wo var, halae ni leil noni yuex su mel leil lei jiuxl wo var.

5

Yisu Leil Ddarzzi Su Mel Leil Guaxr Mibbe

¹ Ni, capor ni leil mar leixl hal mel leil tor nr hie, yaa leil ni niabbor leil quex mel sael a quex nia. Koxltor nor seir capor mel leil lei ni ddei arzzi-nimar mel leil quex mel sael a quex nia. ² Ssormaer ni leil mar leixl hal mel leil lei ni niama leil quex mel sael a quex nia. Ni nixmox zzar seirseir mel xiar ji dae a, koxltor nor seir ssormaer mel leil ni ddei arzzi-nimo leil quex sael a quex nia.

³ Yarzi guaxr su nr zza maermocir hal mel leil mel i du nia. ⁴ Nael maermocir ddei ssormine zza bbeixsael lilbol ilmo zza arddeirnga a mel, anix eil mel dder ake gga ca mel leil ba mibbe, yel yaa yarbbor-yarma, yarbo-yarnei, yarporpo-yarneipo yaa leil perniar xixl a. Eine nga a mel yaa yarzi Arbosobo ddei ddar no a, Arbosobo dder ggese a. ⁵ Koxl ggie lei nr zza, naer ggie lei nr zza maermocir hal mel mel, yaa mel dder Arbosobo leil koxl lalnga a; yel yaa merxixl-merni lei Arbosobo dax ddar biar doxr dae a, Arbosobo leil qiuxr a yaa leil beijjiu lol. ⁶ Nael zzor meixr nei gaxggor meixr lalnga maermocir hal mel mel, ggecir ddei gol dae bbeixarnar a, xiu ddei si ho sael a nga. ⁷ Ni ca mel leil eil mel sael a mul gger nia, nr nga a yaa leil dder botaddu zza a. ⁸ Nael arseir cirssor leil nr guaxr arddeirnga a mel dder yar ddarzzi dae Yisu Zidu dax bei nr mae dae a; armael ca hhexr leil nr guaxr arddeirnga gielgiel yar bir Yisu leil ddar-nr-zzi su hal mel leil lei nr seir a.

⁹ Maermocir mel ddei mi guax deix a mel, qiuxlcei koxl nr ci loxr ho,

halae capor cir ddeir lar zza goxrⁱ hal mel leil lar guax deix ddo. ¹⁰ Yaa yoxl seirseir bei a middux, hherdder ssormine guaxr seir, piar nr saexl ca hal mel leil hexl meixr, Arbosobo ddei cassor-worssor mel leil qihher cir gger, nr seir pex dae su ca mel leil beijjiu, halae yar bei ci xie cirza-hanga seirseir mel bei dae, ha ne nga a sael guax deix ddo.

¹¹ Nael koxltor nor seir maermocir mel mel armael ggecir ddei leil guaxr ssei nr xie a dder, Zidu dax bei mae dae nia-nr-zzir, zeixleixr capor zo niazzir, yel yaa mi ddei guax deix gger nr ddo. ¹² Eine nga a mel, yaa dder halleix yaa bbeix har zaxr goxr mel dax bei nr mae a,^j yel yaa dder zuixl zza a. ¹³ Yaa mel zoxlzoxl a lei dawo pixl lalnga, halae cualcixl-cualge cual ssi a, yaa mel bbaeyo lar nr nga a nei, halae biarcixl-biarge biar meixr, si leil guaxr meixr, bbeixlabox nr nga hal mel lei bbeix. ¹⁴⁻¹⁵ Koxltor nor seir maermocir cirmelmel a yaa bbeix har zaxr goxr mel dax bei nr mae, za xixl lei a Sardaxl dax bei mae ssi jixr ho a; yel ngo dder koxltor nor seir maermocir mel leil quex a yaa leil zeixleixr capor zo a, ssormine hier nei zabbar seirseir a ake guaxr lol. Eine nga a mel, niul leil dir su mel dder niul leil bbeix no ddu nr zza a. ¹⁶ Yisu leil ddarzzi su ssormaer mel ake maermocir zza arddeirnga a, jiaxlhuixl gga ca mel leil maermocir eil ddei leil guaxr lol nr ddo, yaa guaxr nia. Yel jiaxlhuixl gga ca mel dder koxl ggie lei nr zza naer ggie lei nr zza, maermocir hal mel leil guaxr cexr a.

¹⁷⁻¹⁸ Arbosobo Ddei Sul ber leil vaexr dae a bbeix: “Niur mel cei jjiux

ⁱ5:9 *halae capor cir ddeir lar zza goxr* Ca cirmelmel a zzir dae a yilsi mel dder yar capor zza hal car kebal capor dax ker-nr-jiar.

^j5:12 *yaa bbeix har zaxr goxr mel dax bei nr mae a* Yaa bbeix har zaxr dae mel mel hherdder, mi guax deix ho a mel, yaa dder zeixleixr lei capor nr zo a.

dae car a mel, yaa meir ddei leil toxl gex dae nr ddo.”^k ^l Yoxl bbeix: “Wormusu mel mel worper li wo mibbe.”^m Yel ca leil guaxr a yarzi guaxr seir, ca leil guaxr su camar hal mel mel worper nr peix li wo ddo. Arbosobo ddei ddar mel ca leil biar gger nei ca leil mul gger a, zabbar seilseir a mulggersu ca leil guaxr su camar hal mel gielgiel worper nr peix li wo ddo, ca mel lei yaa leil hanol i du. ¹⁹ Arseir ca leil guaxr su camar mel leil goxl arddeirnga a, yar leil bbeix jjiu su ca nr soler nr zza a mel dder noni nr ddo. ²⁰ Ca leil guaxr su camar mel zuixl bei a mel ca mel meixsaer qier leil bota nia, yel kebal ca mel leil fadae lol a yar sael a zuixl nr bei ssi lol.

²¹ Ngo Arbosobo nei Yisu Zidu halae Arbosobo tiur har dae tisir mel meixsaer qier leil zabbar seilseir a ni leil miardal, ni, ni leil mul gger dae ddar eil mel dax zabbar seilseir a bei mae dae nia. Ni ca mel leil ciryoxr a nga nia, ca i nr ddo.

²² Ni ca leil leixrhher ddei yar leil ta gex dae leiddur hal ddei qixrqixlqixr bei gger nr ddo,ⁿ nr nga a mel arddolcar yar zuixl bei a mel, yar ddei zuixl mel ni ddei oldde leil ddeix var. Ni armael leil nixmox zzar seirseir mel lar xiar lol ddo, zuixl bei lol nr ddo.

²³ Ni weixl nr seir a, zoxlzoxl lei no, yel ni ajjix lar dda nr ddo, puxrto zzipbaer lalal sael a ardoxr dda nia.

²⁴ Ca cirmelmel ddei zuixl mel i a dder mia ddo, halae nr ser seir dder saexl ho a; nael ca cirmelmel ddei zuixl mel i a dder mia nr ddo, ser ho a

^k5:17-18 Ddar eil qier mel Semixljil Sul 25:4 leil vaexr dae.

^l5:17-18 Ddar eil qier ddei yilsi mel dder bbeix: niur ddei miar bei dae a mel yar leil zzor lol nia.

^m5:17-18 Ddar eil qier mel Luxljia Sul 10:7 leil vaexr dae.

ⁿ5:22 Ca leil leixrhher ddei yar leil ta gex dae leiddur bei gger yilsi mel dder yar leil ca leil guaxr su camar bei lol.

saelnei saexl ddo.^{o 25} Ciryoxr a nga, seirseir bei dae mel lei i a dder mia ddo, i a dder i teixl lei nr ddo hal mel lei kerzi dae nr cexr.

6

¹ Zebol^P mel nixmox zzar yar ddei seirpor leil mel i du gaxzi nia eine xiar nia. Nr nga a ca mel dder Arbosobo leil bbeix vuxryixr nei niul mul gger dae mel leil bbeix vuxryixr lei. ² Nael zebol ddei seirpor ddei lei Yisu leil ddarzzi arddeirnga a, yaa nr nel mel dder arzzi-nimar sael a nga. Yar visser dae ca ddei mel hherdder Seirpor Yisu perniar dae ca ddei nga a, yel yar yar ddei seirpor leil i nr du bei nr ddo; doxgoxleixr yar leil zabbar seirseir a visser nia. Ni mel zebol mel leil eil mel mul gger nia, yaa leil quex nia.

Nga Nr Zi Mul Gger Nei Zzirbae Tuxr

³ Ca mel si leil mul gger a, Seirpor Yisu Zidu ddei ddar mel dax mul gger nr hoxr, halae yaa ca leil arsae Arbosobo leil i du nia eine mul gger dae nr nga arddeirnga a, ⁴ si leil mulggersu ca eil mel dder yarzi olvaer, azo lei nr saexl, azo lerler ddar bbeix a si dax zex meixr; yel yaa dder ca mel leil zzicarzzi leil nixnox lol, zzi dax zex, zzi leil bbeix no, halae zzi leil nixrxix vaer lol. ⁵ Yaa ca mel dax zex meixr. Yaa nixmox zzar cir doxr lei nr seir xiar dae halae ddarzi mel lei nixmox zzar nr ji dae. Yaa Arbosobo leil i du a lei, cabessor loxr niazzir a i du laexl lalnga.

⁶ Nael arseir Arbosobo leil i du halae Arbosobo cirza-hanga gger dae mel loxr a; eine xiar a mel yar leil yarzi sael seir. ⁷ Niul middurbbor lei

^o5:24 Barloxr ddei yilsi mel dder ca mel seir bbeixsael nr seir mel cirleixr dder i teixl lei nr ddo, yel qixrqixlqixr ca leil guaxr su camar bei ssi lol nr ddo.

^P6:1 *Zebol*/Xilaxl ddar bbeix: “Lorleix bil dae a zebol mu su.”

car lei niul azo lei vei nr si lei mel, niul ssi hal car niul azo vei si cexr bbeixleir? ⁸ Niul zzorddu zza, veixrddu zza a mel dder loxr a eine xiar nia. ⁹ Nael nixmox zzar cabessor loxr nia eine xiar doxr su hal mel mel hherdder si yaa leil sixr i var, yaa halae yaa leil xiaxl dae ddei gga de ji dae a. Yaa xiar dae mel hazzi medeil, yaa armael leil ke var, halae yaa armael leil lei bei xiaxr gger var, yel yaa olga ddei dder mier var.

¹⁰ Zzirbae tuxr a mel dder cirza-hanga nr seir mel lei bei du a. Ca cirmelmel a zzirbae tuxr a, Yisu leil zeixleixr ddar-nr-zzi a, yel yaa dder yarzi goxr sol hal mel pex dae a, nixmox taex no zildu a.

Barloxr Tixrmoxrtaexl Leil Miardal

¹¹ Nael ni mel Arbosobo ddei ca a; yel ni eil mel dax naer lei naer nr ddo. Ni mel yarzi hoxr yarzi bbaehhex hal mel bei ssi nia, Arbosobo leil i du nia, Yisu leil ddarzzi nia, ca leil perniar nia, ssertexr zza nia, pixrhoxr nia. ¹² Ni Yisu Zidu ddei ddar seirseir mel dax zabbar seirseir a bei mae nia, hherdder ni ca dax beix birvul a beix leixl niazzir sael a nga.

Arbosobo ni leil tiur a cirse-cirsil lei yar dax goxr dax dae lol, yel ni olga zza doxr dae var holcir dae nia. Ni ca cirke meixsaer qier leil lei ni cirse-cirsil olga zza biar ho a. ¹³ Arbosobo mel cirza-hanga leil olga zza lol su ddei nga a. Yisu Zidu mel Berdiu-Birlado leil yar arseir a biar gger goxr a. Ngo Arbosobo nei Yisu meixsaer qier leil ni leil miardal: ¹⁴ Ni ni leil miardal goxr ddei zabbar seirseir a bei zei si nia, azo bei lei bei hoxr, botaddu nr zza, hherdder Seirpor Yisu Zidu jjixr lei a niul leil mia lol hal cir ni zzeze ci. ¹⁵ Arbosobo dixl har dae nixixl ddei ci a dder, Yisu leil ca mel leil mia lol du a. Arbosobo mel cir ddeir lar zza. Ca mel lei yar leil bbeix zae gger dae. Yar mel ddo zzir ddei nga a; zzirmar mel ddei Zzirmar ddei nga a; seirpor mel ddei Seirpor ddei nga a. ¹⁶ Yar larni si nr var, yar ca mel naer ssi nr cexr bbobbolbbo ddei gga hher dae, arseir lei yar leil mia nr goxr, arseir lei yar leil mia nr xie, yar leil cirse-cirsil lei

middux lol nia, halae quexrlixl zza lol nia, Amae!

¹⁷ Ni eilleix cabessor hal mel leil quex nia, yaa col nr ddo. Zzirbae mel yarzi pixl so, yel koxl ssei nr ddo, niul leil cirza-hanga lei daxlgaxl-daxllixl gger su Arbosobo ddei leil koxl nia. Yar niul leil cirza-hanga gger a mel niul leil goxr seir lol. ¹⁸ Ni yaa leil quex a seirseir cirke bei lol nia, yaa zza mel hoxrcixlcixlmo caxrleixrleixrmo ca leil gger nia. ¹⁹ Eine nga a mel yaa dder merhhexr dax cirza-hanga naxrcixlcixlmo hal mel zaxr dae a; hherdder arddolcar a yar xi zi niazzir dae hal zzir leil sixrjiuxr hhelhhelmo xiax har zaxr gger dae sael a nga. Yel yaa dder yarzi olga ddei li wo ddo a.^q

²⁰ Tixrmoxrtaexl, ni Arbosobo ni leil jia gger a bei lol mel bei zei si nia. Ca cirmelmel a nrbba nrbba ddar hal mel biar meixr, halae Arbosobo ddei ddar mel dax zex meixr. Yaa zzir dae a yaa biar dae mel hoxr. Nael ni yaa biar dae mel dax bei mae dae nr ddo. ²¹ Yaa biar dae mel dax bei mae su cirmelmel a Yisu leil zeixleixr ddar-nr-zzi a.

Arbosobo nia leil cirza-hanga lei meixl gger lol nia!

^q**6:19** *yarzi olga ddei li wo ddo a* Yarzi olga ddei mel hherdder Arbosobo dax cirse-cirsil lei goxr dae var olga ddei nga a.